



| [angpaghimakas.wordpress.com](http://angpaghimakas.wordpress.com) | [facebook.com/angpaghimakas.58](https://facebook.com/angpaghimakas.58) | [angpaghimakas@yahoo.com](mailto:angpaghimakas@yahoo.com) | .....

# SAULOGON ANG IKA-50 KA TUIG SANG PARTIDO KOMUNISTA SANG PILIPINAS!

DETERMINADO NGA AWAYON KAG RUMPAGON ANG PASISTANG TIRANIYA SANG REHIMENG US-DUTERTE! DAUGON ANG MAS DALAGKU NGA REBOLUSYONARYONG KADALAG-AN PARA SA PROLETARYADONG PILIPINO KAG PUMULUYO!

*Komiteng Tigpatuman, Komiteng Rehiyunal sang Partido sa Isla sang Negros  
Disyembre 26, 2018*

Sa malahalón nga okasyon sang ika-50 ka anibersaryo sa pagtukod sang Partido Komunista sang Pilipinas (PKP), kami, sa Komiteng Tigpatuman sa Komiteng Rehiyunal sang Partido sa Negros, mabaskug nga nagataas kamao sa Pula nga pagsaludo sa tanan nga kadre kag katapuan sang Partido sa isla, tanan nga Pulang kumander kag hangaway sang Bag-ong Hukbo sang Banwa (BHB) Apolinario Gatmaitan Command (AGC), tanan nga alyadong pwersa sang National Democratic Front of the Philippines (NDFP) sa Negros, kag tanan nga progresibo kag patriyotiko nga pumuluyong Negrosanon.

Sa ngalan sang rebolusyonaryong pwersa kag pumuluyo sa Negros Occidental kag Negros Oriental, nagaisa kag mabaskug gid man kami nga nagahatag sang pinakamainit nga pagtamyaw kag rebolusyonaryong pakig-isa sa bug-os nga pungsodnon nga katapuan sang Partido kag sa Komite Sentral sang PKP.

Kabahin kami sa kalipay sang mga mamumugon, mangunguma kag iban pa nga ginahimuslan kag ginapigos nga masa sa Negros kag sa pungsod karon nga ang PKP, nga gintukod sadtong Disyembre 26, 1968 sa teoretikal nga giya sang Marxismo-Leninismo-Maoismo (MLM), naglab-ot na sa makasaysayanong lima ka dekada nga putokputokan bilang taliba sang Pilipinong proletaryo kag namuno sa rebolusyong Pilipino.

Ginahatagan naton sang pinakamataas nga rebolusyonaryong pasidungog ang gatusan ka proletaryong rebolusyonaryo, pwersang gerilya kag masang aktibista sa Negros nga nabuhi kag nagkalamatay sulod sa nagligad nga 50 ka tuig para sa dungganon nga kawsa sang pungsodnon nga demokrasya kag sosyalista nga palaabuton.

Sining karon lang nga mga panghitabo, dugang pa, nagaduso sa aton nga ihalad ang paghandum sa ika-50 ka tuig sang Partido sa isla, partikular sa paghanduraw kag pagpangita sang hustisya para sa siyam ka mamumugon sa kampo nga biktima sang Sagay Masaker, nga amo ang pinakamakasilidni nga insidente sang pagpatay sa mga mangunguma sa subong sa idalum sang pasistang rehimeng US-Duterte.



*Sa sulod sg 50 ka malawig nga katuigan sg matutom nga paghimakas,  
ang Partido, hukbo sg banwa kg ang rebolusyonaryo nga nagahiliugyon nga prente  
nakatipon sg kusog kg nakaangkon sg kumpanyansa kg suporta sg malapad nga pumuluyo*

---

Pareho sa mga biktima sang Escalante Masaker sa panahon sang diktadura ni Marcos, upod sila sa mga martir kag baganihan sang pumuluyo sa Negros nga ang pinakamataas nga sakripisyo para sa handum sang masang anakbalhas pareho ang kabug-aton sang Bukid Kanlaon.

Kag samtang ang Kanlaon indi lang amo ang putokputokan nga bukid sang isla kundi isa ka aktibo nga bulkan nga nagasimbolo sa sosyal nga kinagamo sa Negros, ang handumanan sang ila huwaran nga kabuhi kag ang kabuhi nila Apolinario Gatmaitan, Leonardo Panaligan, Roselyn Pelle, Armando Sumayang Jr kag Rachele Mae Palang, kag iban pa nga mártir sang inaway banwa, mahimong magpabilin sa aton rebolusyonaryo nga diwa nga permi nagadaba-daba kag nagaibwal.

**Ang dungganon nga lima ka dekada  
nga mga kadalag-an sang Partido  
kag sang Rebolusyong Pilipino**

Nga pipila lang ka lamharon nga proletaryong rebolusyonaryo ang nagtukod liwat sa PKP sadtong 1968 kag makahas nga namuno sa pagpadayon sa wala natapos nga pungsodnon-demokratikong rebolusyon sang Katipunan, sa ini pa lang isa na ka kalig-onan nga may dungganong istorikal nga kamalahalon sa ano man nga talaksan.

Ang kamatuoran nga ini wala untat nga ginasauglo kada tuig sa nagligad nga tunga-sa-siglo nagadugang nga mahimo ini nga mas madalom nga napagkit sa kasaysayan kag nagapamatuod gid sa pasahi nga rebolusyonaryo nga determinasyon kag kabakod sang Pilipinong proletaryo kag pumuluyo.

Sa sulod sang 50 ka malawig nga katuigan sang matutom nga paghimakas kontra imperyalismo, pyudalismo kag burukrata kapitalismo, ang Partido, hukbo sang banwa kag ang rebolusyonaryo nga nagahiliugyon nga prente nakatipon sang kusog, nagataas ang kinaalam, kag nakaangkon sang kumpanyansa kag suporta sang malapad nga pumuluyo.

Ang pagtuhaw sang Partido, sang tanan-nga-bahin nga pag-uswag sini kag ang ikasarang sini nga lab-uton ang sunod-sunod nga kadalag-an nangin posible paagi sa husto nga aplikasyon kag integrasyon sang teoretikal nga giya sang MLM sa kongkreto nga kahimtangan sang sosyedad sa Pilipinas kag sa kongkreto nga praktika sang rebolusyong Pilipino.

Gintuhay sang Partido ang duha ka halintang sang rebolusyong Pilipino kag ginapatuman sini ang pangkabilugan nga linya sa pulitika sang demokratikong rebolusyon sang

banwa paagi sa pangmalawigon nga inaway banwa nga nagauyat sa armadong paghimakas kag rebolusyonaryo nga nagahiliugyon nga prente bilang hinganiban.

Sa pagtib-ong sa prinsipyo sang demokratikong sentralismo, ginapaseguro sini ang pagtukod kag pagpabilin sa pinakasolido nga paghiliusa sang organisasyon.

Ang Partido madalom nga nakaugat sa kabuhi kag paghimakas sang Pilipinong mamumugon, mangunguma kag iban pa nga ginahimuslan kag ginapigos nga sahi kag sektor sa tanan nga 18 rehiyon sang pungsod.

Ang Partido absoluto nga nagapamuno sa mga rehiyonal nga kumand sa operasyon sang BHB nga yara na subong sa 17 ka rehiyon nga nagalab-ot sa 110 nga larangan gerilya kag ginakomposar sang pinakamabakod kag pinakaorganisado nga armadong rebolusyonaryong pwersa nga nabug-os sa kasaysayan sang Pilipinas.

Atubang sa brutal nga kontra-rebolusyonaryo nga kampanya nga sunod-sunod nga ginlunsar sa pito ka reaksyunaryo nga rehimen sa idalum sa kontrol sang imperyalismong US, ang Partido, hukbo sang banwa kag ang pumuluyo nangin baganihan sa pagpabilin nga komitido sa armadong rebolusyon nga karon ginakilala na bilang isa ka pinakamabakod kag malawigon sa kalibutan.

Yara inisa lubassang mga sandigan nga rebolusyonaryong organisasyon masa hasta sa mga lokal nga organo sa gahum pampulitika nga nagakomposar sa demokratikong gobyerno sang banwa sang mamumugon kag mangunguma nga may minilyon nga pumuluyo idalum sa iya pagdumala kag impluwensya.

Nagapanguna ini sa madamu nga porma sang paghimakas sang nagkalain-lain nga patriyotiko kag progresibo nga organisasyon kag alyansa – likom kag dayag, sa kaumhan kag sa kasyudaran, kag bisan sa gwa sang pungsod – nga nakalab-ot na sang signipikante nga mga kadalag-an sa pila ka dekada upod na ang makasaysayanon nga pagpalayas sa duha ka papet nga rehimen sadtong 1986 kag 2001.


Ginapangibabawan sang Partido ang mga kahuyangan, ginatadlong ang mga kasaypanan, nagapapasik liwat kag nagamartsa pasulong paagi sa mapanahon nga praktika sang pagsaway kag pagsaway sa kaugalingon kag, kung kinahanglanon, paagi sa kampanya sa panadlong kasubong sa Ikaduha nga Dungganong Kahublagan Panadlong sadtong 1990's nga desaysibo nga nagsikway sa mayor nga “wala” kag tuo nga mga oportunistang kasaypanan.

Ang madinalag-on nga paglunsar sang Ikaduha nga Kongreso sang Partido sadtong 2016, nga nagratipika sa mga amyenda sa Konstitusyon sang PKP kag Programa sang Demokratikong Rebolusyon sang Banwa kag nagpili sa bag-o nga pamunuang sentral, isa ka klaro nga prohiba nga ang Partido solidong nagpabilin nga rebolusyonaryong kuta sang Pilipinong proletaryo kag pumuluyo.

Paagi sa determinado nga paglunsar kag pagpauswag sa pangmalawigon nga inaway banwa kag sa hugot nga pagtib-ong sa linya kontra sa modernong rebisyonismo, ang rebolusyong Pilipino nagaserbi bilang iwag para sa tanan nga pigos nga pumuluyo sa kalibutan kag sa internasyunal nga proletaryo, nga daku ang naamot sa pagpaabante sang kalibutanon nga anti-imperyalistang paghimakas kag sa teorya kag praktika sa kalibutanon nga proletaryong rebolusyon.

Ang dungganon nga ideolohikal, politikal kag organisasyonal nga mga panikang sang Partido sa nagligad nga 50 ka tuig nagdul-ong sa rebolusyonaryong pwersa kag pumuluyo sa pinakamabakod nga sadsaran halin diin padayon nga makasulong paagi sa dalagkung tikang pasulong sa masunod nga katuigan tubtob sa makumpleto ang demokratikong rebolusyon sang banwa kag masugdan ang sunod nga halintang sang sosyalistang rebolusyon.

Ang masanag nga mga kadalag-an sang Partido kag ang malig-on nga rebolusyonaryong diwa kag legasiya sini nagahatag inspirasyon sa pumuluyo sa madalom nga paagi nga bisan ang paghari sang pasistang teror kag pagpaniplang nga malapnagon subong sa pungsod indi makapugong sa ila sa paghandum kag pakig-away para sa palaabuton sang matuod-tuod nga pungsodnon kag pangkatilingbanon nga kahilwayan.



## Ang nagalala nga tagumatayon nga krisis sang mala-kolonyal kag mala-pyudal nga nagahari nga sistema kag ang paghari sang pasistang teror kag pagpatalang sang rehimeng US-Duterte

Ang Partido magasulod sa ika-anum nga dekada sini sa tunga sang mas labe pa nga mapanghangkat nga panahon para sa proletaryadong Pilipino kag pumuluyo.

Ang pangkabilugan nga krisis sang pangkalibutanon nga sistemang kapitalista padayon nga nagalala kadungan sang paglab-ot sa lain kalala kag makahalalit nga putukputokan sang tagumatayon nga krisis sang mala-kolonyal kag mala-pyudal nga lokal nga nagahari nga sistema.

Sa ila puluan ka milyon, ang pumuluyo sa subong mas pa nga ginapaantos, kag kada adlaw dugang pa nga ginabawian bisan sang pinakagamay na lang nga palangabuhian. Ginapaluhod pa gid sila sa kahadlok, diin ginatos kalibo sa ila ang ginapaagom sang tanan nga sahi sang pagpanglapas sa kinamatarung sa maka-alarma nga brutal nga pamaagi kag sa pinakagarapal nga pagpang-abuso nga wala sang paghinulsol.

Ina nga makasilidni nga padron sang pagpanghimulos kag pagpamigos nabatyagan sa Negros pareho sa diin man nga bahin sa Pilipinas.

Ang dalagkuan nga ekonomiya sang *monocrop sugarcane* sang isla, nga kontrolado sang dalagku kag despotiko nga agalon mayduta nga daw pinakakonsentrado sa isa lang ka heyograpikal kag sosyal nga kahimtangan, nagaimposar sa mayorya sang pumuluyo sang isa ka wala-katapusan nga siklo sang kaimolon.

Si Joel Abong, ang bata nga ehemplo sang kapigaduhon kag gutom sa Negros sa tunga-tunga sang 1980s, mahimo nga madugay na nga napatay, apang nagpabilin siya nga buhi nga handumanan sa nakapagkit nga pag-antus sang Negrosanon kag sang wala-katapusan nga kalalat-an sang tiempos muertos.

Sa tanan nga mga probinsya sa pungsod, ang Negros Occidental kag Negros Oriental ara sa ikaduha kag ikaapat nga ihap sang damo nga pumuluyo nga nangabuhi sa tuman nga kapigaduhon.

Gindabukan ang kagutom sa siniglo nga pagpabor sa mga pananom nga pang-eksport kag indi-pagkaon sa agrikultura. Sa masubra 800 kalibo ektarya sa agrikultural nga duta, indi magnubo sa 221 kalibo ektarya ang nakareserba para sa tubo, samtang 138 kalibo ektarya ang humayan kag 102 kalibo ektarya ang natamnan sang mais.

Kalabanan sa mga mangunguma kag mamumugon sa uma wala nagapanag-iyang kadutaan nga ginataliuma sa ila mga pamilya sa pila na ka henerasyon. Matapos ang masobra 46 ka tuig, 128 kalibo ektarya sa 430 kalibo ektarya sang isla nga gintalana nga ipaidalum sa





Comprehensive Agrarian Reform Program ukon CARP, nagpabilin nga wala ginpanagtag sang bogus nga programa sa repormang agraryo sang mga reaksyunaryo nga rehimen, halin sa Presidential Decree 27 ni Marcos hasta sa CARPER ni Benigno Aquino III.

Ang monopolyo sa duta pinakaathag sa katubuhan. Sa mga hasyenda sang katubhan nga naglab-ot sa 100 ektarya pataas, masobra 43 kalibo ektarya ang kontrolado lamang sa 269 ka mga agalon mayduta, nga ang pipila ka indibiwal nagapanag-iya sang duta sa liboan ka ektarya. Samtang ang tignapulo kalibo nga ginatawag nga benepisyaryo sa reporma sa duta, kalabanan nagaantus na lang sa halos indi makalab-ot sa isa ka ektarya.

Bisan ang mga mangunguma nga nahatagan na sang *certificate of land ownership* ukon CLOA wala gid sang epektibo nga kontrol sa kadutaan nga kuno sila na ang nagapanag-iya, bangud sa, lakip sa iban pa nga rason, kakulang sa bastante nga suportang serbisyo nga mangin bulnerable sila sa sistemang arendo, *block farming* kag iban pa nga eskema sang agalon mayduta sa katuyuan nga ikonsentra ang magagmay nga kadutaan balik sa mga dalagku nga agalon mayduta.

Lapnagon ang kakulang sa trabaho, istable man ukon indi. Kalabanan sa mga mamumugon wala makabaton sang legal nga ginmandato nga minimum nga sweldo, kag wala gid sila makabaton sang sosyal nga benepisyo nga para sa ila. Ang malala, sa ginatawag nga sistemang pakyaw nga pinaka-kinaandan nga areglo sa trabaho sa hasyenda, ang mamumugon sa uma makabaton lang sang diutay nga P50 kada adlaw sa kalabanan.

Ang kabuhi kag palangabuhian sang pumuluyong Negrosanon mas mabutang sa katalagman paagi sa paghatag sang kinamatarung sa pagmina sa dumuluong nga monopolyo kapital kag lokal nga kumprador nga may kahilabtan sa masobra 58 kalibo ektarya nga ang kadam-an yara sa Cauayan-Hinobaan-Ilog-Candoni-Kabankalan-

Sipalay ukon CHICKS erya sang isla.

Mas pa nga makabalaka sa gilayon, ang bilog *monocrop* nga ekonomiya sang isla ginalauman nga makaagum sang daku nga kabudlayan tungod sa agresibong neoliberal nga duso karon sa pagbukas sa merkado sang Pilipinas dira sa pagbaha sang imported nga kalamay.

Sa pagkamatuod, ang reaksyunaryong rehimen ni Rodrigo Duterte nakapokus sa pagsunod sa mga neoliberal

nga dikta sa ekonomiya sang iya amo nga imperyalista. Ginapasiguro sini ang wala-katapusan nga pagkaatrasado sang mala-pyudal nga ekonomiya sang pungsod kasubong sa tanan nga nagliligad nga mga papet nga rehimen sang neokolonyal nga estado sang Pilipinas.

Sa pihak nga bahin, ang pagkapapet ni Duterte may ara gid mga kinatuhay sa iya ginasundan nga mga presidente. Samtang nagapabilin nga masinulondon kag nagapaulipon sa US sa wala pat-od nga kasugot, partikular nga determinado man si Duterte nga mangin mainabyanon sa imperyalismong China para sa kasiguradohan.

Bisan ano pa man, sa hanay sang lokal nga oligarkiya, si Duterte mismo, ang iya pamilya kag iya mga kroni amo ang sigurado nga makabenepisyo sang pinakadagku gikan sa nagapadayon nga dumuluong nga pagpangawat kag pagpanghimulos sa pungsod, sa sistema sang *pork barrel*, kag upod na ang ilegal nga pagbaligyaanay sang droga, bangud sa posisyon sang pribilehiyo nga ila ginauyatan subong bilang nagaharing paksyon sang mahimuslanon nga sahi sang dalagkung kumprador, agalon mayduta kag burukrata kapitalista.

Samtang si Duterte napamatud-an nga wala sang kabulusgan kasubong sang sin-o man nga tirano kag kawatan.

Ang masingki nga kontradiksyon sulod sa hanay sang mga reaksyunaryong sahi, upod sang nagatubo nga kaakig sang pumuluyo kag sang ila nagabaskug nga pagkig-away, nagaduso kay Duterte nga mabuang sa paglagas sa absolutong gahum para sa iya kaugalingon, kag sa pinakakumpleto nga posibleng konsentrasyon sang burukratiko nga pagpangawat para sa iya dunot nga grupo sang oligarkiya, mga tinawo sa militar, warlords, kag mga dugay na nga naboksas nga wala na sang kredibilidad nga mga hepeng-kawatan sang mga nagliligad nga pasista kag papet nga rehimen.

Sa tabon sang pederalismo, kontra-terorismo kag ginatawag niya nga gyera kontra droga, kag upod ang dayag nga suporta sang US, si Duterte sa pagkamatuod nagahimo sang mga eskema agud maipatuman ang iya pasistang diktadura batok sa pumuluyo bisan ano pa man ang bili.

Ginapabilin niya ang wala-katapusan nga martial law sa Mindanao, kag ginaobligar ang Kongreso para sa ekstensyon sini sa kada oras nga malab-ot na ang natalana nga panahon sa pagpatuman. Sa maluya nga basehanan sang isa ka memo, gindeklara niya ang “state of lawless violence” sa Bikol, Eastern Visayas kag mga probinsya sang Negros, kag nahimo nga halos tunga sa tanan nga mga rehiyon sa pungsod yara na sa idalum sang laye militar ukon martial law. Sa tanan nga mga indikasyon, indi na magdugay nga ang martial law pormal na nga ideklara sa bug-os nga arkipelago.

Bisan pa man, ang de facto martial law, ang paghari sang pasistang teror kag binutig ni Duterte, makita na sa bilog pungsod sa subong.

Ang lubos nga represibo nga gahum sang Armed Forces of the Philippines (AFP) kag Philippine National Police (PNP) amo ang ginapahulag agud hadlukon ang pumuluyo, uyatan kag ikontrol ang pulitikal nga oposisyon, kag paagi sa nagalala nga mga insidente sang ekstra-hudisyal nga pagpamatay ukon EJK, pahipuson ang mga nagapanindugan kag nagabato.

Dugang pa, ang burukrasya sang pungsod sa subong halos militarizado na samtang nagapadayon ang sunod-sunod nga pagpapungko sa mga anay opisyal militar sa mga yabe nga posisyon sa gobyerno. Antes pa man ginpaggwa ang Executive Order 70, ang mga klaster sang mga ahensya sang gobyerno, mga yunit sang lokal nga administrasyon kag ang ila dapat sibil nga mga programa kag proyekto yara na sa proseso sang reoryentasyon agud makabagay sa kumand kag kontrol sang militar.

Sa konteksto sini sa gilayon, ang katuyuan sang martial law, de facto man ukon dayag nga gindeklarar, amo ang angkunon para sa rehimeng US-Duterte ang pinakadamo nga pwesto sa palaabuton nga 2019 midterm nga piniliay, agud hatagan ligwa ang pagpaseguro sa *charter change*, kag mahatagan sang wala-katapusan nga termino sa opisina si Duterte kag ang iya mga alyado.

Ginapatuman man ini sa todo-todo nga kontra-rebolusyonaryo nga gyera batok sa rebolusyonaryong armadong pwersa sa kaumhan kag sa demokratiko kag patriyotiko nga ligal nga kahublagan masa, ang pinakadeterminado nga kasumpung sang reaksyunaryo nga nagaharing sistema kag pinakaseryoso nga hangkat sa damgo sang pasistang diktadura ni Duterte.

Sa Negros, ginapadamo sang AFP ang presensya sang mga *peace and development teams* ukon PDT sa mga

baryo nga sa kamatuoran, nagahalit gid sa matuod-tuod nga kalinong kag kauswagan dira. Gindugang ang duha ka lubos ka batalyon sadtong 2018, ang 15th kag 94th IB sang Philippine Army, kag nagsaad nga magadugang pa sila sang tropa sa isla halin sa Eastern Mindanao Command.

Malisyuso nga ginamarkahan sang rehimeng US-Duterte ang kolektibo nga produksyon sang pagkaon nga inisyatiba sang mga mamumugon sa uma sa land cultivation areas (LCA), bilang pronte kuno nga proyekto sa para pinansya sang BHB. Ginatulod sang rehimen sa publiko ang pagpaisog sa mga agalon mayduta nga magpasaka sang mga kriminal nga kaso batok sa nagaantus nga mangungumang Negrosanon nga nagaorganisa sang LCA kag nagapanawagan sang matuod-tuod nga repormang agraryo. Masaligan ini nga kakunsabo sang mga gamhanan nga agalon mayduta sa sunod-sunod nga pagpamatay sa mga lider-mangunguma.

Si Duterte kag ang iya pasista nga makinarya sa propaganda agresibo sa pagpalapta sa binutig nga lapas kuno sa laye, kriminal kag teroristang binuhatan ang paghimakas sang libuan ka mamumugon sa kampo para sa pagpataas sa sweldo, benepisyo, kag libre nga pagpanagtag sang duta. Ang mga lider mangunguma kag mga organisador ginahimong target indi lang sa pagpakalamaot kundi sa mas seryoso nga pahog sang ekstra-hudisyal nga pagpamatay, pareho sa nahitabo sa abugado sang pumuluyo nga si Benjamin Ramos sadtong Nobyembre.

Ang mga militanteng organisasyon sang mangunguma kag ang rebolusyonaryong kahublagan ang ila malisyoso nga ginabasol sa Sagay Masaker agud dasig nga hatagan rason ang padayon nga pagpamatay nga may basbas sang estado paagi sa ila ginatawag nga “all-out war” kakombina sa martial law sa isla nga epektibo na nga ginpatuman sa Memorandum Order 32 sang Malacañang.

Si Duterte, ang tirano nga ginalamon sang iya hingamo nga mangin diktador, isa man ka manipulador nga tuman ka mapanghalit kag manugpatalang nga sahi, ini nga kinaiya iya lang gid kag iya gingamit sa pagpakamalaot sa iya mga kaaway kag sa tinguha nga magpalapta sang kinagamo agud itago ukon hatagan rason ang iya mga krimen batok sa pumuluyo.

---

*Si Duterte  
napamatud-an  
nga wala sang  
kabulusgan  
kasubong sang  
sin-o man  
nga tirano  
kag kawatan*

## Ang nagadaku nga anti-Duterte nga kahublagan masa kag ang nagapadayon nga inaway banwa

Ang kamatuoran nga isa ka buang-buang kag manugpatay ang nagapungko sa karon sa Malacañang nagakumpirma lamang nga ang mga reaksyonaryo nga sahi indi na makapamuno sa daan nga pamaagi.

Samtang ang mala-kolonyal kag mala-pyudal nga nagaharing sistema padayon nga nabuyagyag sa iya pinakadunot nga ubud, mas labe na nga ginahakos sang pumuluyo sa karon ang demokratikong rebolusyon sang banwa. Kay sa kasubong sini nga panahon sang kadudulman mangin pinakaklaro ang kasanag sang rebolusyonaryo nga alagyan.

Ang pumuluyo mangin pila ka beses nga mas maisog sa pagtindog para sa paghimakas, karon nga kahibalo sila nga ang rebolusyunaryong kahublagan para sa matuod-tuod nga pungsudnong kahilwayan kag demokrasya ginapangunahan sang isa ka organisasyon sang pinakamuklat-sa-sahi nga mga rebolusyonaryo nga tunay nga nagadampig sa ila.

Subong man, sa tunga sang damo nga signipikante nga pamaagi sa pagdumdum sa anibersaryo sang ila pinalangga nga Partido, ang proletaryadong Pilipino kag pumuluyo nagaisa sa pinakaimportante nga pagsaulog paagi sa pagmartsa pasulong nga wala sang kahadlok sa pakig-away kag pagrumpag sa pasistang tiraniya sang rehimeng US-Duterte.

Ang tiraniko nga nagaharing paksyon ni Duterte, mahimo lamang nga magtan-aw samtang lubos ang ila panginwala, halin sa ila tindogon nga arogansya ukon tungod sa pagkahisa kag kahadlok.

Ang BHB, sa bahin man sini, may ara sang tanan nga rason agud saulogon ang bulawanon nga tuig sang partido nga nagtukod kag absoluto nga nagapamuno sini. Ang Pulang hukbo, kung sa diin ginadeploy ang pinakamaayo nga kabataan sang pumuluyo, ginatan-aw ang iya sini palaaboton nga makasaysayanon nga ika-50 ka tuig tatlo ka bulan sugod sa karon. Halin sadtong Marso 29, 1969, ang PKP ang nagagiya sa BHB nga matungdan ang iya sini nga tahas bilang prinsipal nga instrumento sang demokratikong rebolusyon sang banwa para kasab-an, hublasan kag sa takda nga panahon, lubos nga dugmokon ang armadong aparato sang reaksyonaryo nga estado.

Sa maabot nga binulan, ang mga yunit sang AGC, dugangan pa sang milisya sang banwa, nagapreparar para sa pagpabaskug sang mga taktikal nga opensiba. Makaamot ini sa aton katuyuan nga mahatagan dungog ang ika-50 ka tuig sang mga rebolusyunaryong kadalag-an sang Partido, hukbo sang banwa kag pumuluyo sa dramatiko nga pamaagi.

Subong man mas hinanali nga mangin sabat ini sa hangkat nga panginbabawan ang sunson kag sustinido nga

## *Sa kasubong sini nga panahon sg kadudulman mangin pinakaklaro ang kasanag sg rebolusyonaryo nga alagyan*

operasyong militar sang pasista kag mersenaryong AFP batok sa rebolusyonaryo nga kahublagan kag sa pumuluyo sa isla. Paagi sa hugot nga pag-uyat sang prinsipyo sang malaparon kag sunson nga gerilya nga pakig-away base sa nagalapad kag nagadalum nga baseng masa, ang rebolusyonaryo nga pwersa sa Negros dapat maka-amot subong sa pungsudnong pagpaninguha agud paslawon ang mapintas kag todo-todo nga kontra-rebolusyunaryong gyera sang rehimeng US-Duterte.

Halin sa pag-uyat sa gahum ni Duterte sa tunga-tunga sang tuig 2016, ang Partido sa Negros nagapagpabakod sa BHB sa politiko-militar nga hambalanon. Nangin madinalag-on ini sa paglunsar sang armado nga taktikal nga opensiba batok sa pinakaabusado nga mga yunit sang AFP, PNP kag ila dugang nga pwersang paramilitar. Gin-implementar man sang BHB ang mga punitibo kag prebentibo nga desisyon sang rebolusyunaryong hukmanang banwa sa idalum sa demokratikong gubyrno sang banwa nga nakabase sa kaumhan.

Sugod Pebrero 2017 tubtob Nobyembre 2018, ang mga yunit sang BHB-AGC naglunsar sang indi magnubo sa 21 ka aksyon militar, kung sa diin ang tropa sang kaaway nakaangkon sang sobra 25 ka kaswalidad kag sa diin nakumpiska ang sobra 20 ka matag-as kag nugbo nga armas. Masobra 30 iban pa matag-as nga armas ang nakumpiska halin sa mga operatibang paniktik sang AFP kag PNP, mga despotikong agalon mayduta kag masupog nga kriminal nga elemento sa sobra 73 punitibo nga operasyon sang BHB.

Antes pa sini, sa masobra lima ka bulan nga pagdeklara sang unilateral ceasefire upod sa gobyerno ni Duterte, napamatud-an sang Partido ang iya mataas nga halintang sang katalum sa politika kag ginseguro sini nga ang BHB ginatuman ang iya salsalon nga disiplina sa mga obligasyon sini sa untat-lupok sa negosasyong pangkalinong ukon peace talks samtang maisugon nga nakig-away sa plano sang kaaway para iduso ang rebolusyunaryong pwersa pakadto sa pagkapisibo kag kapitulasyon.



Subong man, nabuhat sang mga rebolusyonaryo nga pwersa sa Negros ang pagpalapta sa balayon sang sosyal kag pang-ekonomiyang reporma nga ginaduso sang NDFP, paggamit sa malapad nga suporta sang tanan nga positibong pwersa, kag pagpauswag sa sumpay sini bisan sa mga elemento sang reaksyunaryo nga nagaharing sahi sandig sa prinsipyo sang rebolusyonaryo nga hilikuton sa nagahiliugyong prente.

Ang madinalag-on nga paghiwat sang Peace Forum sadtong Disyembre 2016 sa isa ka sonang gerilya sa sur sang Negros nga gintambungan sang lima ka libo nga masa nga tagasuporta kag alyado sang armadong rebolusyon, nagahatag pagtamod sa solidong pag-isa sang tanan nga rebolusyonaryong pwersa sa rehiyon kag sa naagum sini nga malapad nga suporta halin sa pumuluyo.

Halin sadtong 2016, ang BHB sa Negros nagahiwat sang politiko-militar nga paghanas para sa mga kumander kag hangaway sini, nagtukod sang bag-o nga lubos-panahon ukon FT nga yunit, kag nagdugang kabakud kag kapasidad sa mga pormasyon sang lokal nga milisya sa mga baryo, kag nagpalapad kag nagkonsolida sa nagatuhaw nga larangan gerilya samtang nagatukod sang mga bag-o nga larangan.

Sa pag-alagad sa mga direksyon nga gintalana sa subong sang Partido, kag paagi sa husto nga pag-aplikar sang anti-pyudal nga linya sa sahi kag mga prinsipyo sang s olido nga pag-organisa, madasig na nga ginatukod sa karon ang mga sandigan nga rebolusyonaryong organisasyon masa sang mangunguma, kababainhan kag pamatan-on kag mga lokal nga organo sang demokratikong gahum. Ginapataas man ang lebel sini taas pa sa lebel sang mga baryo para makasiguro ina, upod ang iban pa, nga ang mga kontra-pyudal kag kontra-pasista nga kampanyang masa kag

paghimakas epektibo nga malunsar kag koordinado sa mas nagalapad nga sakop.

Samtang ang inaway banwa nagabugso sa kaumhan sang Negros kag sa iban pa nga bahin sang pungsod, ang legal nga demokratiko kag ang patriyotikong kahublagan masa sang mamumugon, mangunguma kag mga intelektwal sa urban, kag ang nagkalain-lain nga sektor sang malapad nga nagahiliugyong prente nga nagabato sa pasistang tiraniya, masupog nga korapsyon, pabug-at nga buwis, indi mapunggan nga pagtaas sang balaklon, kag ang doble nga pagtraydor sang rehimeng US-Duterte sang aton pungsodnong soberanya para sa US kag China, ginalauman nga ini nga pwersa maghabok pakadto sa kadalanan sa palaaboton nga mga bulan.

Ini sa husto nga tion magatulod kay Duterte pakadto sa kritikal nga punto sang pagkahamulag sa politika, nga mahimo siya nga hamulag bisan sa suporta sang iya tampad nga armadong pwersa, hasta sa ulihi nga mapatalsik ini sa poder.

Ini dugang pa nga makapaluya sa reaksyonaryong nagaharing sistema, samtang sa pihak nga bahin, ang rebolusyonaryong kahublagan padayon nga magabaskug.

Ang nagapadayon nga pagtipon sang rebolusyonaryong kusog sa militar kag politika, paagi sa integrado nga pagpatuman sang gerilya nga pakig-away, agraryong rebolusyon, kag pagtukod sang baseng masa, sa eksperto nga pag-uyat sa mga prinsipyo kag taktika sang rebolusyonaryo nga nagahiliugyong prente, kag ang wala untat nga pagdaku sang Partido pareho sa numero kag sa proletaryong ikasarang sa pagpamuno, kinahanglan para sa pagsulong sang pangmalawigon nga inaway banwa sa abanse nga bahin sang stratehikong depensiba nga halintang, pakadto sa halintang sang stratehikong pagkapatas kag mas taas pa.



## Ang Partido kag ang demokratikong rebolusyon sang banwa sa Negros sa nagligad nga lima ka dekada



Ang ika-50 nga anibersaryo sa pagtukod sang PKP isa ka maayo nga panahon para tun-an ang kasaysayan sang rebolusyong Pilipino sa idalum sang husto nga giya kag pagpamuno sang Partido. Ini magahatag sa aton sang inspirasyon gikan sa mga naratibo sang kaisog, pagsakripisyo nga wala nagatamod sa kaugalingon, kag manggaranon nga leksyon nga malahalón sa pagpatuman sang aton mga rebolusyonaryong hilikuton sa subong. Ang mga pamatan-on kinahanglan mangin muklat nga manunubli sang rebolusyong Pilipino bangud ila ini nga rebolusyon. Samtang ang rebolusyonaryong pwersa kag pumuluyo sang Negros kinahanglan labi nga mahalón kag magtu-on halin sa kasaysayan sang rebolusyonaryong kahublagan sa isla.

Ang Negros, isa ka madugay na nga balwarte sang monopolyo sa duta kag sistemang hasyenda, nahimo nga pinakatambok nga duta para sa nagtuhaw nga bag-o nga demokratikong rebolusyon sadtong ulihi nga bahin sang dekada '60 kag temprano nga bahin sang dekada '70.

Paagi sa nagapanguna nga pagpaninguha sang mga proletaryong rebolusyonaryo halin sa pamatan-on kag kahublagan estudyante kag mga progresibo nga elemento halin sa sektor sang simbahan, ang militante nga demokratikong paghimakas sang masa sang pumuluyo sa Negros, ilabi na ang paghimakas sang mga mamumugon sa kampo kag mamumugon sa sentral, madinalag-on nga nagpanugod dungan sa hilikuton sa pagtukod sang Partido sa isla kag preparasyon sa malapad nga kaumhan para sa armadong rebolusyon.

Sa pagkomporme sa polisiya nga unahon ang mga mayor nga isla ukon “major islands first” policy sa pungsodnon nga pagpalapnag sang inaway banwa, ang armadong rebolusyon

nag-abot sa Negros, ang ika-apat nga pinakadaku nga isla sa pungsod, sa temprano nga bahin sang 1969. Apang nag-angkon ini sang dagmit nga pag-atras bangud sa kasaypanan sa paglunsar sang mga aksyon militar antes pa matukod ang mga rebolusyonaryong baseng masa.

Upod ang mga leksyon nga natun-an halin sa panugod nga eksperyensya kag paagi sa maantuson nga hilikuton masa, mga breyktru sa kontra-pyudal nga paghimakas kag subong man sa madinalag-on nga punitibong aksyon batok sa pinakaginakaakigan nga mga despotikong agalon mayduta, natukod ang mga rebolusyonaryong baseng masa sadtong 1973 sa hanay sang mga imol nga mangunguma kag mga settler sa CHICKS (Cauayan-Hinobaan-Ilog-Candoni-Kabankalan-Sipalay) erya sang sur nga bahin sang Negros Occidental kag sa mga interyor nga baryo sa katambi nga mga banwa sang Negros Oriental sadtong 1976.

Sa idalum sang pinakamabudlay nga mapiguson nga kahimtangan sa gin-imposar sang rehimeng US-Marcos nga dayag nga pasistang paghari, ang likum nga kahublagan nagpaninguha kag ginpauswag ang demokratiko kag patriyotiko nga kahublagan masa sang sandigan kag iban nga mga sektor sa urban kag sa mga lugar nga ginpreparar para sa sonang gerilya. Ang progresibo nga diskurso sang simbahan kag ang lain-lain nga mga pormang kultural nagamit sa maksimum nga epekto sa pagpukaw, pag-organisa kag pagmobilisa sang masa para sa pungsodnon demokratiko nga paghimakas. Sang 1976, kadungan sang krisis sa industriya sang kalamay, ang masang Negrosanon nagpanugod sa hayagan nga pagpamatok sa puti nga kahadlok sang martial law paagi sa paglunsar sang mga pang-ekonomiya nga welga kag mga politikal nga demonstrasyon.

Ang estable nga pagtubo sang kahublagan masa sa urban sadtong dekada '70 tubtob sa tunga-tunga sang dekada '80 ang naghatag sa armadong rebolusyon sang amo man kaestable nga kuluhaan sang lubos-panahon nga mga pwersa halin sa mamumugon, estudyante, taong simbahan, manunudlo kag subong man sa hanay sang anay detenido politikal nga namobolisa sa tanan-nga-bahin nga pagpauswag sang mga larangan gerilya kag pagtukod sang mga bag-o nga larangan.

Sang 1986, ang organisado nga masa sa mga larangan gerilya naglab-ot na sa 140,000, samtang ang masa nga yara sa mga hasyenda kag sa mga haywey kag kabaybayunan naglab-ot sa mga 200,000.

Kabahin sa pinakalanog nga mga taktikal nga opensiba nga ginlunsar sang BHB sa isla sa sini nga panahon, amo ang reyd sadtong 1983 sa Visayan Maritime Academy sa Bacolod City nga nakakuha sang indi magnubo sa 300 ka matag-as nga kalibre sang riple, kag ang dungan nga mga reyd sadtong 1984 sa Scout Ranger Coy headquarters



kag municipal police station sa banwa sang Isabela nga naghakot sang total nga 70 ka matag-as nga kalibre sang riple kag pila ka armas nga *artillery*.

Ang armado kag legal nga paghimakas sang pumuluyo sa rehiyon naghatag inspirasyon kag nag-amot sa pungsodnon nga kahublagan nga kontra sa diktadura ni Marcos nga naglab-ot sa pagpalayas sa rehimeng US-Marcos sadtong 1986.

Sang 1988, ang tatlo ka distrito sa iloy nga larangan sang South West nga natukod sadtong 1981, nakapagpalapad na sang pila ka pilo, nag-ani sang pila ka larangan gerilya sa Central Negros, Northern Negros kag South East Negros nga epektibo nga nakasakop sa halos tanan nga distrito sang duha ka probinsya sang Negros o yara sa mga 2/3 sang bilog nga isla. Sa sini man nga tuig, ang BHB sa Negros naglab-ot na sa iya pinakataas nga ihap nga 800 lubos-panahon nga mga hangaway.

Samtang nakita sa dekada '80 ang wala tupong nga pag-abanse sang rebolusyonaryong kahublagan sa Negros, sa amo man sini nga panahon nga ang sayop nga linya ni Arturo Tabara kag sang iya rebisyunistang grupo sa Visayas Commission kag sa Negros Regional Party Committee nagpanugod sa pagporma kag sa ulihi gin-implementar sa rehiyon.

Ang konsepto sang stratehiko nga kontra-opensiba (SCO) nga ginaduso ni Tabara halin sa temprano nga bahin sang 1985 nagresulta sang grabe nga “wala” nga oportunistang kasaypanan sang adbenturismong militar, wala sa panahon nga regularisasyon sang BHB, kag insureksyonismo. Sini nagpadulong sa dramatiko nga paghuyang sang mga baseng masa sa kaumhan kag sa erya sang urban halin 1989 tubtob 1992, paghuyang sang rebolusyonaryong disiplinang hukbo sang banwa, paglapta sang isterya nga kontra-impilador, kag gangsterismo. Bangud sini nga mga kahuyangan, ang armadong rebolusyonaryong pwersa kag masa sa rehiyon nangin partikular nga bulnerable sa atubang sang Oplan Thunderbolt, ang mabangis nga armadong kontra-rebolusyonaryong kampanya nga ginlunsar sa isla sadtong 1989.

Ang ika-10 Plenum sang Komite Sentral sang PKP sadtong 1992 nagsikway sang malala nga “wala” kag tuo nga oportunistang kasaypanan sang dekada '80, upod na adtong nakometer sa Negros kag naglunsar sang Ikaduha nga Dungganong Kahublagan Panadlong (IDKP). Samtang ang Tabara-Itabag nga grupo wala nagsuporta sa kahublagan panadlong kag sa baylo nagpalapta sang malisyoso nga mga intriga kontra sa sentral nga liderato sang Partido kag sang ulihi nagporma sang ila kaugalingon nga peke nga rebolusyonaryong partido kag hukbo, kag gin-upod nila ang daku nga ihap sang mga kadre kag pwersang gerilya.

Sang 1993, ang sentral nga liderato sang Partido nagporma sang Probisyunal nga Komiteng Tigpatuman sa Negros agud matipon kag maorganisa liwat ang Partido kag hukbo sang banwa sa rehiyon. Paagi sa pang-ideolohiyang edukasyon, pagsaway kag pagsaway sa kaugalingon kag ang pagsuma sang rebolusyonaryong eksperyensya, ang 70 ka lubos-panahon nga pwersa sang BHB kag mga kadre sang komite sang Partido sa urban nga nagpabilin nga komitido sa sandigan nga mga prinsipyo sang Partido, ginkonsolida kag ginmobilisa para mareyalisa ang katuyuan sang IDKP sa Negros.

Sa proseso sang pagbawi sang rebolusyonaryong baseng masa, ang armadong pwersa sang BHB kag ang demokratikong kahublagan masa nag-abanse liwat. Nabuhat ini sa pihak sang nag-una kag mabudlay nga hilikuton sa pag-atubang sa pwersa sang estado samtang dungan nga ginaatubang kag ginapamatukan ang mga malisyoso nga kabutigan kag aktwal nga armadong pagpang-atake sang mga rebisyunistang elemento sang paksyong Tabara-Itabag, nga sa ulihi nahublasan kag napamatud-an nga sila mismo ayhan mga ahente sang estado kag tagpangapin sa interes sang dalagkung agalon mayduta.

Ang kadalag-an sang IDKP sa isla makabig nga isa ka pinakasignipikante nga kadalag-an sang Partido sa Negros kay indi lang ini nangin desaysibo sa pagsalbar sang rebolusyonaryong kahublagan sa rehiyon kundi gindul-ong pa gid sini ang kahublagan pakadto sa isa ka paborable nga posisyon para sa padayon nga pagsulong.

---

*Ang ika-50 nga anibersaryo sg PKP isa ka paborable nga panahon para sa mga proletaryong rebolusyonaryo sa Negros para sumahon kg tun-an ang ila eksperyensya, kg epektibo nga ipatuman ang mapang-away nga mga hilikuton nga gintalana sg programa sg Partido sa subong, kg magpadayon sa pagsulong sa tanan-nga-bahin nga paagi*

---



Sang 1999, natukod ang bag-o nga Komiteng Rehiyonal sang Partido. Sa sini man nga panahon, tatlo ka magka-iping nga larangan gerilya ang natukod sa Central Negros. Antes pa sini, ang hepe nga tigpatuman sang Oplan Thunderbolt, si General Jarque, nagbaylo ukon nag-defect sa rebolusyonaryong kahublagan sadtong 1998. Ang napabaskog nga legal nga demokratikong kahublagan masa sa isla nag-amot man sa malapad nga nagahiliugyon nga prente nga nagpatalsik sa rehimeng US-Estrada sadtong 2001.

Sang 2005, madinalag-on nga nahiwat ang Rehiyunal nga Kumperensya sang Partido.

Ang hukbo sang banwa kag ang rebolusyonaryong baseng masa sa Negros maisog nga nanindugan sa sunod-sunod nga armadong kontra-rebolusyonaryong kampanya nga ginlunsar sang US-Arroyo kag US-Aquino nga mga rehimen. Napaslaw sang BHB sa kabilugan ang konsentrado nga atake sang indi magnubo sa 30 ka kompaniya sang AFP nga ginpadala sang rehimeng US-Aquino paagi sa Oplan Bayanihan kon sa diin ang isla kabahin sa mga pungsodnon nga prayoridad sini. Upod sa mga madinalag-on nga mga

taktikal nga opensiba sang BHB sa panaho nga ini amo ang reyds sa CAFGU detachment sa banwa sang Toboso sadtong 2010 nga nakakompiska sang 20 ka matag-as nga kalibre sang riple.

Samtang ang rebolusyonaryong pwersa kag masa sang Negros nagapakigbahin sa aton mga kaupdan sa bug-os nga pungsod sa pagpaslaw sang tanan nga pagpaninguha sang rehimeng US-Duterte sa pag-imposar sang iya pasista nga diktadura, ang Partido determinado nga makapangibabaw sa partikular nga mga tendensiya kag kahuyangan sang konserbatismo, burukratismo kag emperisismo nga makasagabal sa padayon nga pag-uswag sang rebolusyon sa rehiyon.

Ang ika-50 nga anibersaryo sang PKP isa ka paborable nga panahon para sa mga proletaryong rebolusyonaryo sa Negros para sumahon kag tun-an ang ila eksperyensya, padalumon ang ila paghangop sa mga prinsipyo kag polisiya sang demokratikong rebolusyon sang banwa, kag epektibo nga ipatuman ang mapang-away nga mga hilikuton nga gintalana sang programa sang Partido sa subong, kag magpadayon sa pagsulong sa tanan-nga-bahin nga paagi.



# Sug-alawon ang ika-50 nga Anibersaryo sg PKP sg mas Mataas nga Kalibre sg Kaisog kg Determinasyon nga Magdaug!



MENSAHE SANG  
REVOLUTIONARY COUNCIL OF TRADE UNIONS (RCTU) – NEGROS

KA MACARIO OBRERO  
SPOKESPERSON  
RCTU-NEGROS

Rebolusyonaryo nga Pagsaludo sa Bulawanon nga Pagsukat sang aton Partido Komunista sang Pilipinas-MLM!

Lima ka dekada ang nagligad, pipila lamang ka mga matingas nga binhi sang mga komunistang Pilipino nga armado sang pipila lamang ka mga armas ang liwat nga nagtukod sang Partido Komunista sang Pilipinas sa ubay sang Marxismo-Leninismo-Maoismo.

Sa karon linibo-libo na ang mga Partidista upod ang Pulang Hukbo kag rebolusyonaryong masa sa halos tanan nga bahin sang Pilipinas ang nagapukaw, nagaorganisa kag naga-mobilisa para sa tanan nga bahin nga pagsulong sang demokratikong rebolusyon sang banwa nga may sosyalistang perspektiba.

Sang sahing mamumugon, bilang pinakasulong nga sahi sa malakolonyal kag malapyudal nga sosyedad sang Pilipinas ang nag-agum sang pinakaabanse nga teorya sa pagrebolusyon sa ubay sang Marxismo-Leninism-Maoismo. Ginpanday sini ang malig-on nga paghiusa sa sahing mangunguma ang mayor nga pwersa sang DRB. Ginlapad ang pagpamuno sini sa tanan nga pigos kag nagahimakas nga demokratikong pwersa paagi sa iya partido pampolitika nga Partido Komunista sang Pilipinas.

Ang paghimakas sang sahing mamumugon gikan pa sa daan nga Partido Komunista nagapakita sang kamalahalon nga maidapat, makahos kag mapangabuhi sang taga ka mamumugon ang buhi nga teorya sang MLM. Dapat mahangpan ang istorikal nga papel sini sa kasaysayan sang makasahi nga pagrebolusyon sa pagdula sang sahi kag makasahi nga pagpanghimulos para mapundar ang komunismo sa kalibutan.

Gingiyahan sang Partido ang paghimakas sang mamumugon para sa tawhanon nga sweldo-benepisyo, kinamatarung sang pag-union kag seguridad sa trabaho kag iban pa. Gin-angot ini nga makasahi nga paghimakas sa mas malapad nga pakig-away sang pumuluyo para sa matuod nga reporma sa duta kag pungsudnon nga

industriyalisasyon. Malahaloon ang papel sang sahing mamumugon sa pagpundar sang Pulang Hukbo para sa pagpabaskog sang armado nga paghimakas, pagtukod sang rebolusyonaryo nga gobyerno kag paglutas sa gahum sang imperyalismo, burukrata kapitalismo kag pyudalismo.

Sa sulod sang 50 ka tuig sa pagpamuno sang Partido, natigayon sini nga mapanday ang malig-on nga pagpamuno sang sahing proletaryado sa rebolusyong Pilipino nga may madalom nga ugat sa malapad nga masa. Nagadalanguhanon ang nagahari nga sahi nga lutoson ang rebolusyong Pilipino para sa pagwasak sang Partido paagi sa magasto kag mapintas nga mga kampanyang kontra-rebolusyonaryo sa bulig sang Imperyalismong US. Pasulit-sulit nga napaslaw ang ila handum nga “pahubsan sang tubig para mapatay ang isda” bangud madalom na ang ugat sang pagpamuno sang Partido sa pumuluyong Pilipino.

Humalin sa pagginahum sang pasistang diktadurang Marcos tubtub sa karon nga maki-Marcos nga Presidente Rodrigo “Digong” Duterte, gin-atubang kag ginpaslaw sang nagahimakas nga pumuluyong Pilipino sa pagpamuno sang Partido ang pasismo sang estado. Sa kaumhan kag kasyudaran, sa diin man nga lugar sa Pilipinas ang Partido nangin madinalag-on sa pagsabwag sang iya binhi kag nag-ani sang madamo nga kadalag-an sa pihak sang atake sang kaaway. Nasubuhan sa sakripisyo kag kabudlayan, maisog nga gin-atubang sang mga katapo sang Partido sa iwag sang MLM ang halos tanan nga proble internal man o external, daku man o gamay, komplikado man o indi.

Ang sahing mamumugon kag malapad nga pumuluyo nagapanindugan nga dapat na nga tapuson ang mapiguson kag kontra-pumuluyo nga rehimen US-Duterte. Paagi sa pursigido, determinado kag maantuson nga paghimakas kita madaug!

Mabuhi ang Partido Komunista sang Pilipinas!

Tagaan sang mataas nga pagsaludo ang tanan nga Martir sang Partido kag Rebolusyon!





# Pahayag sg PKM-Negros sa Ika-50 nga Anibersaryo sg Partido Komunista sg Pilipinas



MENSAHE SANG  
PAMBANSANG KATIPUNAN NG MGA MAGBUBUKID-NEGROS ISLAND

FELICIDAD MERCADO  
TIGPAMABA  
PKM-NEGROS ISLAND

Ginapaabot sang rebolusyonaryong organisasyon sang mangunguma sa isla sang Negros ang pagpanginbulahan ka Pulang saludo sa tanan nga mga kadre kag katapo sang Partido Komunista sang Pilipinas sa pagsaulog sa ika-50 nga anibersaryo sini.

Kaangay sang isa ka bulawan, nangin matingkad ang papel sang PKP bilang abanseng destakamento sang proletaryado kag pagpamuno sang rebolusyon Pilipino.

Sa isla sang Negros makita ang malapad nga hacienda sang tubo, monocrop ang kinaiya sang ekonomiya, nagaproduser ini sang 54-56% sang kalamay sa pungsod. Pero kun ano katam-is ang kalamay nga gina produkto sini amo man kapait ang kahimtangan sang mga pumuluyo labi na sang sahing anakbalahas. Nagpabilin nga nakakonsentra sa kamot sang pipila ka dalagko nga agalon mayduta ang malagpad nga kadutaan sa pihak sang masobra lima ka dekada nga implementasyon sang palpak nga programa sang repormang agraryo. Mas labi nga malala ang kahimtangan sang anakbalhas sa panahon sang tiempo muerto.

Sa kaumhan, lapnagon man ang pyudal nga pagpanghimulos kag pamigos nga ginaeksperyensya sang mga mangunguma kag mamumugon sa uma sa porma sang usura, tuman kanubo nga suhol, kulang o halos wala benipisyo, pagbarat sa presyo sang produkto kag di makatawo nga kondisyon sa pagtrabaho. Nangin agresibo man ang dislokasyon sa palangabuhian kag pagpalayas sa mga mangunguma sa ila komunidad sa ngalan sang “development” nga programa parehos sang Negros First Ranch sa banwa sang Murcia, Ilog-Hilabangan River Basin Dam Project nga nagasakop sa madamo nga banwa kag syudad sang Negros Oriental kag Occidental, Southern Negros Industrial Estate sa Brgy. Bacuyangan banwa sang Hinobaan subong man ang dalagkuan nga pagmina sang aton kabukiran kag kadagatan.

Ang ini nga mga kondisyon ang nagtulod sa sahing anakbalhas sa kaumhan sa pag-usoy sang dalan sang paghimakas para ipakig-away ang mga demokratiko nga kinamatarung. Pero imbis nga pamtan, nangin mapintas

ang sabat sang mga despotiko nga agalon gamit ang mga bayaran nga armadong goons kag mersenaryo nga reaksyunaryong armadong militar. Ihemplo sini ang pag masaker sa siyam ka mga mangunguma sa syudad sang Sagay kag ang pagpamatay sa mga lider kag katapo sang mga hayag nga organisasyon sang mangunguma, ginapamatay man ang maga tagasuporta sini kaangay sang abogado nga si Atty. Benjamin Ramos sa syudad sang Kabankalan.

Sa pihak sini tanan wala nagakalinkang ang sahing anakbalhas para ipadayon ang paghimakas sa sari-sari nga porma. Mas labing determinado ini sa paglunsar sang mas makahas kag mabaskog nga kampanyang anti-pyudal, anti-pasista kag anti-imperyalista nga paghimakas batok sa nagakaagnas na nga malakolonyal kag malapyudal nga katilingban Pilipino. Wala sang iban nga pilian ang sahing anakbalhas kundi ang mag rebolusyon.

Ginsulong sang kahublagan mangunguma ang away para sa matu-od nga reporma sa duta, pinaagi sa minimum kag maksimum nga katuyuan angay sang pagpanubo sa renta kag pagdula sang usura tubtob sa malab-ot ang kumpiskasyon sa kadutaan batok sa mga despotiko nga agalong mayduta kag libreng mapanagtag sa mga mangungumang wala kag kulang sang duta nga palangabuhian.

Sa kaumhan amat-amat nga gina pundar ang nagalapad kag nagadalom nga mga organo sang gahom pampulitika. Matambok diri ang duta para sa pag-abanse sang halintang sang inaway banwa.

Gamit ang husto nga linya pampulitika, ideolohiya kag organisasyon, nagpakasampaton ang kadre kag katapo sang PKP para sa makasahing pagpamuno sa mga paghimakas sang masang anakbalhas kag sa iya bilidhon nga papel para sa lubos nga maipaabanse ang pungsodnon-demokratiko nga paghimakas bilang sandigan nga alyansa sang sahing proletaryado sa pagsulong sang demokratikong rebolusyon sang banwa. Matu-od nga kung wala sang Partido wala sang direksyon ang rebolusyon.

Mabuhay ang ika-50 nga Anibersaryo sang Partido Komunista sang Pilipinas!



*Kaangay sang isa ka  
bulawan, nangin matingkad  
ang papel sang PKP bilang  
abanseng destakamento sang  
proletaryado kag pagpamuno  
sang rebolusyon Pilipino.*



## **Pahayag sg Katipunan sg Samahang Manggagawa (KASAMA)-Negros sa ika-50 nga Anibersaryo sg Partido Komunista sang Pilipinas**

Mapula nga Panginbulahan sa Partido Komunista sang Pilipinas (PKP) sa iya ika-50 nga Anibersaryo! Rebolusyonaryo nga Saludo sa tanan nga mga kadre sang Partido, mga Pulang hangaway, mga pwersa sang pungsudnon demokratiko nga rebolusyon, kag mga pigos nga mga masa nga nagahimakas para sa matuod-tuod nga pagbag-o sang sosyedad Pilipino! Isa ka mapula nga saludo sa mga martir nga kadre sang Partido kag mga pulang hukbo nga maisog nakigsumpong sa armado nga pwersa sang malupigon nga mga sahing dalagku nga kumprador burgis, dalagku nga agalon may duta kag mga ahente sang imperyalistang gahum!

Ang mga rebolusyonaryo nga aktibista kag pwersa sa idalom sang Katipunan ng Samahang Manggagawa (KASAMA)-Negros lubos nga nagapakig-upod sa pagselebrar sang ika-50 nga pagsukat sang pagtukod sang isa ka Maxista-Leninista-Maoista (MLM) nga partido sa pungsod Pilipinas. Sa pihak sang wala-untat kag mas nagasingki nga atake sang pasista nga mga rehimen, nangin epektibo kag madinalag-on nga nalampuwasan sang Partido ang mga upang sa padayon nga pag-abanse sang pungsudnon nga rebolusyon sa sulod sang 50 ka tuig. Ang kubos kag pigos nga pumuluyo sa hanay sang mga mamumugon kag mala-proletaryado nagakalipay sang nalab-ot nga kadalagan sang Partido sa pagpamuno sang demokratiko nga rebolusyon sang banwa. Nangin mitsa ang PKP sa pagsulong sang paghimakas sang mga imol nga taga-syudad kag pumuluyong Pilipino agud wasakon ang mala-kolonyal kag mala-pyudal nga sistema nga amo ang ugat sang problema sa duta, puluy-an, palangabuhian kag lapnagon nga paglapak sang tawhanon nga kimatarong.

Sa mas nagalala nga krisis sang monopolyo kapitalismo, mas nagalala man ang atake sang estado kag mga dumuluong nga negosyo sa mga mamumugon kag pumuluyo paagi sa pagpatuman sang neoliberal nga mga polisiya kag grandyoso nga mga kampanyang “kontra-insurekyon”. Labi nga apektado ang mga imol sa komunidad nga ginapangdemolis kag eject agud hawanan ang mga baybayon, higad kasubaan kag iban pa nga publiko nga duta para sa dalagku nga negosyo. Ang asud-asud nga pagsaka sang tanan nga balaklon kag serbsiyo paagi sa TRAIN ni Duterte, mas nagpabug-at sa daw indi na madala nga palasanon sang pumuluyong pigos.

Samtang ang pondo sa kaban sang reaksyonaryo nga gobyerno nagakadto lamang sa benepisyong mga nagahari nga sahi kag ila mga idu-ido. Wala sang ano man nga paltik nga proyekto para sa mga imol ang nangin madinalag-on, sa baylo nagdugang ini sang disgusto sang pumuluyo batuk sa sistema nga nagatuga sang inhustisiya. Mismo ang kahimtangan sang mga imol amo ang padayon nga nagahangkat sa tanan nga pwersa sang rebolusyon nga ipadayon kag iduso sa mas mataas nga halintang ang inaway banwa tungod wala na sang iban pa nga solusyon agud mawasak ang monopolyo sa duta kag rekursong pungsod kundi paagi sa ululupod nga paghimakas sang ginahimuslan kag ginapigos nga pumuluyo kag pagsulong sang demokratiko nga rebolusyon sang banwa tubtub sa kadalagan.

Mabuhay ang ika-50 nga Anibersaryo sang Partido Komunista sang Pilipinas!

Mabuhay ang Pungsudnon Demokratiko nga Rebolusyon!

# Mensahe sa KM – Negros para sa ika-50 nga kasumaran sa subling pagkatukod sa Partido Komunista sa Pilipinas



MENSAHE SANG  
KABATAANG MAKABAYAN - NEGROS

(BISAYA)

Pinaka-init nga rebolusyonaryong pagtimbaya sa mga pamatan-ong rebolusyonaryo sa Kabataang Makabayan, mga katapo sa tanang rebolusyonaryong organisasyong masa, tanang demokratikong pwersa, mga hangaway sa Bagong Hukbong Bayan, mga sakop sa Partido Komunista sa Pilipinas ug sa masang gihimuslan nga atong gialagaran!

Karong Disyembre 26, 2018 ang ika-50 nga anibersaryo sa subling pagtukod sa Partido Komunista sa Pilipinas. Gisaalog sa mga batan-ong kadre sa Kabataang Makabayan, ang mga umaabot nga mangulo sa rebolusyon, ang makasaysayanong 50 ka tuig nga pagpangulo sa Partido sa gubat batok sa imperyalistang US ug lokal nga nagharing hut-ong ug sa tinuoray nga pag-alagad sa katawhan.

Ang atong rebolusyonaryong pwersa ubos sa pagpangulo sa Partido nagkab-ot og kalig-on sa mga milabay nga tuig ug nagpadayon og pakusog sa gerilyang pakiggubat sa kabanikanhan ug pag-abante sa legal nga demokratikong kalihukan ug tinago nga kalihukan sa kasyudaran. Gitukod ang malapad nga anti-pasista, anti-pyudal ug anti-imperyalista nga prente ug gipalig-on ang ideolohiya, pulitika ug organisasyon sa Partido. Taliwala niini ang kaaway nangita og bag-ong mga pamaagi sa pagwasak sa Partido. Kahibalo kita tanan sa gyera kontra-rebolusyonaryo ni Duterte, sa iyang pasistang terorismo nga mohinog padulong sa konsolidasyon sa iyang pasistang diktadurya ug pagdeklara sa martial law sa tibuok nasud pinaagi sa bag-ohay nga Memo Order 32, Executive Order 70 ug pagpalanat sa Martial Law sa Mindanao. Mao kini ang tubag sa reaksyunaryong gobyerno sa bag-ong kusog sa tibuok rebolusyonaryong kalihukan. Mao nga hagit sa mga pamatan-ong rebolusyonaryo karon nga andam ug madasigong muatubang sa mga sakripisyo ug kabudlayan bisan pa man sa pagbuhis og kinabuhi.

Kung dili kita modaog sa atong pakigbisog, kung ang kasamtangan nga alang-alang kolonyal, alang-alang pyudal nga sistema magpadayon sa pagkontrol sa gahum ug modominar sa atong nasud, ang kabatan-onang Pilipino adunay ngitngit ug gubot nga umaabot. Ang pagtunhay sa dunot nga burgis-pyudal nga kultura dala sa krisis sa politika ug ekonomiya ug miguba sa atong kabatan-onan. Tungod sa ekonomikanhong kondisyon ug pag-abandona sa estado, ang mayorya sa mga kabatan-onan adunay kalisdanan nga

masinati ang libre ug de kalidad nga edukasyon. Wala sila hatagi og higayon nga ma-praktika ang ilang mga kapasidad ug talento, mapalambo ang ilang kaalam, ug mapakita ang ilahang pinakataas nga potensyal sa ilang pagka-rebolusyonaryo. Mao kini ang hinungdan nga napunta sila sa droga, alcohol, video games, ug uban pang bisyo. Pero ang mga kabatan-onan mao ang mudawat sa rebolusyon nga mao ang mubag-o sa katilingban. Kita nga mamahimong proletaryado sa umaabot mao ang mangulo sa hukbo ug mamahimong lider sa rebolusyon padulong sa kadaugan sa nasudnon-demokratikong rebolusyon ug sa mosunod nga sosyalistang konstruksyon. Mao nga dako ang paglaom ug pagsalig sa Partido sa mga Kabataang Makabayan.

Ang mga nagtunhay nga katilingbanong kahimtang angayan nga adunay radikal nga kabag-ohan sa pundasyon sa ekonomiya, pulitika, ug sosyo-kultural nga istraktura. Gikan sa sinugdanan sa atong pakigbisog, ang mga batan-ong kadre sa atong proletaryadong Partido nga nakighiusa sa handom sa mga masang nilupigan para sa kagawasan padayong nisaka sa kabanikanhan aron musalmot sa armadong pakigbisog, ang pinakataas nga porma sa rebolusyonaryong diwa ug prinsipyo. Sa mga kondisyon nga nagtunhay ang alang-alang kolonyal, alang-alang pyudal nga nasud, anaa sa kabanikanhan ang tinuoray nga awayan, ang misyon sa pagpakyas, pagguba sa dunot nga sistema sa katilingban nga nagpig-ot sa katawhang Pilipino ug tibuok kalibutan, ang atong makasaysayanong tahas sa pag-ilis sa daan ug dunot nga katilingban.





Ang Partido nanawagan sa mga kabatan-onan nga mosaka sa kabanikanhan ug musalmot sa armadong pakigbisog aron ang rebolusyonaryong diwa ug mga bag-ong ideya ug paspas nga panghuna-huna nga makita sa kinaiya sa mga kabatan-onan, mahiusa sa masang mag-uuma. Importante nga ang mga batan-ong kadre maghimo og radikal nga desisyon – ang desisyon nga mutransporma sa ilang mga kinabuhi, sa pagsalmot sa armadong pakigbisog, kay kun walay mga kabatan-onang rebolusyonaryo nga musunod sa mga karaang kadre, unsaon nato pagpadayon sa atong pakigbisog ug unsaon nato hingpit makab-ot ang kadaugan?

Mga kabatan-onang rebolusyonaryo sa Kabataang Makabayan, ayaw og pagduha-duha ug ayaw kahadlok sa pagbiya sa inyong mga komportableng kinabuhi ug mga makikaugalingon nga handom alang sa pagserbisyo sa katawhan, ang kinabuhi sa gerilyang manggugubat!

Gamita ang inyong mga nakat-unan samtang magpakusog sa inyong rebolusyonaryong diwa ug baruganan.

Mabuhi ang rebolusyonaryong kabatan-onan!

Mabuhi ang Bagong Hukbong Bayan!

Mabuhi ang National Democratic Front of the Philippines!

Mabuhi ang atong minahal nga Partido Komunista sa Pilipinas! Sulong kita kutob sa kadaugan!



## **Pahayag sg KAGUMA-Negros Kaangot sa Ika-50 nga Anibersaryo sg Partido Komunista sg Pilipinas**



MENSAHE SANG  
KATIPUNAN NG GURONG MAKABAYAN - NEGROS CHAPTER

MALAYA EDUKADOR  
SPOKESPERSON  
KAGUMA - NEGROS

Sa okasyon sang pagsaulog sang ika-50 nga anibersaryo sang Partido Komunista sang Pilipinas, ang Katipunan ng Gurong Makabayan (KAGUMA) nagasaludar kag padayon nga nagakilala sa tunay nga Partido sang sahing proletaryado nga amo gid lang ang may ikasarang sa pagpamuno sang matuod-tuod nga rebolusyon agud mahilway ang katawhan halin sa ano man nga porma sang paghimulos kag pagpamigos kag malab-ot ang sistemang sosyalismo padulong sa komunismo.

Sa sulod sang 50 ka tuig, ang PKP nangingin madinalag-on sa epektibo nga pagpamuno sang rebolusyong Pilipino sang masang pigos kag ginahimuslan batok sa imperyalismo, burukrata kapitalismo kag pyudalismo nga nagahari sa mala-pyudal kag mala-kolonyal nga sistemang sang sosyedad Pilipino.

Nagin mabangis sa sahing mangunguma, mangingisda, imol nga taga syudad, kag mga magagmay nga mga propesyonal ang mga nagligad nga mga rehimen apang tungod sa maathag kag husto nga pagpamuno sang Partido napangibabawan ang tanan nga pagtinguha sang mga reaksyonaryo nga patalangon kag gub-on ang aton mga organisasyon nga maisog nga nagasulong sang pungsodhon demokratikong rebolusyon.

Maid-id man nga nakig-away ang aton Partido sa pagtinguha sang mga rebisyonista kag mga traidor nga idiskarel kag patalangon ang husto nga linyang politika

kag linyang masa sang rebolusyon. Nangingin epektibo nga hinangiban ang Marxismo-Leninsmo-Maismo agud mapatalum ang mga estratehiya kag taktika sang pagsulong sang inaway banwa.

Samtang ang KAGUMA naman lubos gid nagakilala sang iya malahalang nga papel sa kahublagan propaganda kag mapagsik nga pagsuporta sang armado nga paghimakas para sa rebolusyon. Sa husto nga pag-ubay sang Partido nakaangkon man sang mga kadalag-an ang KAGUMA sa malaparan nga pagpukaw kag pag-organisa kag subong man sa militante nga pagpahulag sang sektor sang edukasyon para iduso ang ila mga sektoral kag politikal nga demanda.

Ang KAGUMA lubos man mga nagapati nga paagi sa aktibo nga pagpakigbahin sang sektor sa edukasyon sa paghimakas sang sahing mamumugon, mangunguma kag sa bug-os nga sahing pigos sa sosyedad, epektibo nga masulong ang kadalag-an sang rebolusyong Pilipino.

Sa katapusan, sa sini man nga mga okasyon ang KAGUMA nagadumdum kag nagasaludo gid sa tanan nga katapo sang Partido nga nangingin martir kag baganihan sang rebolusyong Pilipino. Ang paghalad sang ila kabuhi para sa rebolusyon naghatag sa aton sang halimbawa kag inspirasyon sang kabuhi sang isa ka dungganon nga komunista.

Mabuhay ang PKP!

Mabuhay ang Partido sang sahing pigos!





## Pahayag sg CNL-Negros sa Pagsuporta sa Ika-50 Nga Anibersaryo sg Partido Komunista sg Pilipinas (PKP-MLM)



MENSAHE SANG  
CHRISTIANS FOR NATIONAL LIBERATION (CNL)-NEGROS ISLAND

Sa ika-50 nga anibersaryo sang liwat nga pagtukod sang Partido Komunista sang Pilipinas (PKP), ang Christians for National Liberation (CNL)-Negros nagapanginbulahan kag nagapahayag sang iya mataas nga pagsaludar sa Partido nga nagapamuno sang pungsudnon nga rebolusyon sa sulod sang 50 ka tuig. Sa lima ka dekada, napamatud-an sang Marxista-Leninista-Maoista nga Partido ang kahustuhon sang iya ginaduso nga linya sa ideolohiya, pulitika kag organisasyon gani padayon ini nga nagabaskog kag nagaani sang mga kadalag-an sa pihak sang masingki nga atake sang estado.

Kadungan sang aton nga pagsug-alaw, aton man ginahanduraw ang mga kaisog, sakripisyo kag baganihan nga binuhatan sang mga nauna sa aton nga mga kaupod sa paghimakas agud hilwayon ang pungsod kag masa sa imperyalista nga pag-ulipon kag pyudal nga pagpanghimulos. Madamu sa ila ang naghalad sang kabuhi kag dugo agud hawanan ang dalan sang rebolusyon para sa lubos nga kadalag-an. Madamu sang mga martir sa rebolusyon ang nagikan sa hanay sang taong simbahan. Daku ang aton kalipay nga sila nangin kaupod naton sang pag atubang

sa mabangis nga hanot sang papet nga mga rehimen. Sila padayon nga nagahatag inspirasyon samtang padayon nga ginaduso ang rebolusyon sa mas mataas nga halintang sang inaway banwa.

Ang CNL bilang isa sa mga likom kag rebolusyonaryo nga organisasyon nga nagapanindugan para sa hustisya-sosyal kag kalinong, padayon nga magapatuman sang iya misyon upod sa malapad nga pumuluyo, agud desasysibo nga mawasak ang imperyalismo, pyudalimso kag burukrata kapitalismo sa sosyedad Pilipino. Nagapati ang CNL nga paagi lamang sa demokratiko nga rebolusyon sang banwa nga ginapamunuan sang Partido Komunista sang Pilipinas sarang malutas ang imperyalistang gahum kag ang iya kadampig nga mga nagahari nga sahi. Padayon ini nga nagahikot sang iya tahas sa pagpukaw, pag-organisa kag pagmobilisa sang rebolusyonaryo nga mga pwersa tubtob nga mapundar ang isa ka sosyedad nga hilway, demokratiko kag may hustisya.

MABUHAY ANG DEMOKRATIKO NGA REBOLUSYON SANG BANWA!

MABUHAY ANG PARTIDO KOMUNISTA SANG PILIPINAS!

